

LIGJ
Nr. 39/2025

PËR KONTROLLIN E KUFIRIT SHTETËROR¹

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1
Objekti

Ky ligj përcakton rregullat për regjimin e kontrollit kufitar të personave që kalojnë kufirin shtetëror të Republikës së Shqipërisë dhe bashkëveprimin ndërmjet autoriteteve kombëtare përgjegjëse për kontrollin dhe mbikëqyrjen e kufirit shtetëror të Republikës së Shqipërisë.

Neni 2
Përkufizime

Në këtë ligj, përkufizimet e mëposhtme kanë këto kuptime:

1. “Kontroll kufitar” është veprimtaria që kryhet në përputhje dhe për qëllim të këtij ligji në kufirin shtetëror të Republikës së Shqipërisë, si përgjigje posaçërisht ndaj një synimi për të kaluar ose aktit të kalimit të kufirit, pavarësisht rrethanave dhe që përbëhet nga verifikimi kufitar dhe mbikëqyrja kufitare.
2. “Mbikëqyrja e kufirit” është tërësia e masave që zbaton Policia Kufitare dhe e Migracionit dhe agjencitë e tjera të zbatimit të ligjit në segmentet e kufirit shtetëror ndërmjet pikave të kalimit kufitar dhe në pikën e kalimit kufitar, përfshirë ujërat e brendshme dhe ujërat territoriale, me qëllim parandalimin dhe goditjen e krimit ndërkufitar, kalimit të paligjshëm të kufirit dhe migracionit të parregullt.
3. “Menaxhimi i integruar i kufirit” është koordinimi dhe bashkëpunimi kombëtar e ndërkombëtar nga autoritetet dhe agjencitë përkatëse të përfshira në menaxhimin e kufirit në përputhje me kuadrin ligjor, marrëveshjet ndërkombëtare të ratifikuara nga Kuvendi, si dhe traktatet, dypalëshe ose shumëpalëshe, të lidhura me vendet e tjera.
4. “Pikë e kalimit kufitar” është çdo vend kalimi, i autorizuar nga autoritetet kompetente për kalimin e kufirit shtetëror të Republikës së Shqipërisë.
5. “Pikë e përbashkët e kalimit kufitar” është çdo pikë e kalimit kufitar, e vendosur në territorin e Republikës së Shqipërisë ose në territorin e një shteti fqinj, në të cilën rojat kufitare shqiptare dhe rojat

¹ Ky ligj është përafruar pjesërisht me:

- rregulloren e (BE) 2016/399 të Parlamentit Evropian dhe të Këshillit, datë 9 mars 2016, “Mbi Kodin e Bashkimit Evropian që përcakton rregullat e regjimit të lëvizjes së personave përmes kufijve (kodi i kufijve Schengen)”, e ndryshuar. Nr. CELEX 32016R0399, Fletorja Zyrtare e Bashkimit Evropian, seria L, nr. 77, datë 23.3.2016, faqe 1–52;

- rregulloren (BE) 2019/1896 të Parlamentit Evropian dhe të Këshillit, datë 13 nëntor 2019, “Për rojat kufitare dhe bregdetare evropiane”, që shfuqizon rregulloret (BE) nr. 1052/2013 dhe (BE) 2016/1624”. Nr. CELEX 32019R1896, Fletorja Zyrtare e Bashkimit Evropian, seria L, nr. 295, datë 14.11.2019, faqe 1–131;

- rregulloren zbatuese të Komisionit (BE) 2021/581, datë 9 prill 2021, “Mbi pasqyrimin e informacionit të Sistemit Evropian të Mbikëqyrjes Kufitare (EUROSUR)”. Nr. CELEX 32021R0581, Fletorja Zyrtare e Bashkimit Evropian, seria L, nr. 124, datë 12.4.2021, faqe 3–39;

- rregulloren (KE) nr. 1931/2006, të Parlamentit Evropian dhe të Këshillit, datë 20 dhjetor 2006, “Vendosja e rregullave për trafikun kufitar lokal në kufijtë tokësorë të jashtëm të shteteve anëtare dhe që ndryshon dispozitat e Konventës *Shengen*”. Nr. CELEX 32006R1931, Fletorja Zyrtare e Bashkimit Evropian, seria L, nr. 405, datë 30.12.2006, faqe 1–22.

kufitare të shtetit fqinj kryejnë verifikime kufitare në hyrje dhe në dalje, njëri pas tjetrit, në përputhje me legjislacionin përkatës kombëtar dhe sipas marrëveshjes përkatëse dypalëshe.

6. “Roje kufitare” është çdo punonjës i Policisë Kufitare dhe Migracionit, i caktuar në pikën e kalimit kufitar ose përgjatë apo në afërsi të kufirit shtetëror për të kryer detyra të kontrollit kufitar në përputhje me këtë ligj.

7. “Verifikim kufitar” është veprimtaria që kryhet në pikën e kalimit të kufirit për të garantuar se personat, përfshirë mjetet e tyre të transportit dhe sendet që kanë në zotërim, mund të lejohen për të hyrë në territorin e Republikës së Shqipërisë ose për të dalë prej tij.

8. “Verifikimi vijës së dytë” është një verifikim i mëtejshëm, i cili mund të kryhet në një vend të posaçëm, tej vendndodhjes së vijës së parë, në të cilën kryhen verifikime minimale ose tërësore për të gjithë personat.

9. “Zonë e verifikimit kufitar” është një zonë e përcaktuar dhe e shënuar në të cilën mund të kryhen verifikime sipas dispozitave të këtij ligji.

10. “Qarkullim lokal kufitar” është kalimi i rregullt i një kufiri shtetëror tokësor nga banorët kufitarë, me qëllim që të qëndrojnë në një zonë kufitare për arsye sociale, kulturore ose ekonomike, të bazuara ose për arsye familjare, për një periudhë që nuk e kalon kufirin kohor të përcaktuar në këtë ligj.

11. “Vendkalime të veçanta kufitare” janë vendkalime të miratuara në marrëveshje vetëm për qarkullimin lokal ndërkufitar.

12. “Verifikim kufitar i automatizuar” është përdorimi i pajisjeve elektronike, ku mblidhen të dhëna për identifikim dhe për qëllim të verifikimit kufitar.

13. “Pasagjer” është çdo person, përfshirë edhe personat që udhëtojnë transit në Republikën e Shqipërisë, me përjashtim të anëtarëve të ekuipazhit dhe që rezultojnë në listën e pasagjerëve.

14. “Informacioni paraprak për pasagjerin (API)” është pjesë e të dhënave të regjistrit të rezervimit të pasagjerit dhe përfshin llojin, numrin, vendin e lëshimit dhe datën e skadimit të çdo dokumenti udhëtimi, shtetësinë, mbiemrin, emrin/emrat tjetër/e tjerë, gjininë, datën e lindjes, linjën e fluturimit, numrin e fluturimit, datën e nisjes, datën e mbërritjes, aeroportin e nisjes, aeroportin e mbërritjes, kohën e nisjes dhe kohën e mbërritjes, si dhe numrin e përgjithshëm të pasagjerëve që transportohen.

15. “Njësia e informacionit të pasagjerit” është struktura pranë Drejtorisë së Përgjithshme të Policisë së Shtetit, e cila përpunon të dhënat e pasagjerit.

16. “Baza e të dhënave të pasagjerit” është baza e të dhënave, që përmban të gjitha të dhënat e regjistrit të rezervimit të pasagjerit dhe administrohet nga njësia e informacionit të pasagjerit.

Neni 3

Menaxhimi i integruar i kufirit

1. Për zbatimin e këtij ligji, autoritetet përgjegjëse veprojnë në përputhje me konceptin e “Menaxhimit të integruar të kufirit”, i cili udhëhiqet nga parimi i solidaritetit dhe bashkëpunimit, në përputhje me kuadrin strategjik të menaxhimit të integruar të kufirit dhe përbëhet nga elementet, si më poshtë:

a) kontrolli kufitar, përfshirë masat e ndërmarra së bashku me të gjitha autoritetet e zbatimit të ligjit për parandalimin, zbulimin dhe hetimin e krimit ndërkufitar;

b) analizimi i risqeve për sigurinë e brendshme dhe analizimi i kërcënimeve që mund të ndikojnë funksionimin ose sigurinë e kufijve;

c) bashkëpunimi ndërmjet autoriteteve kombëtare dhe agjencive që veprojnë në fushën e kufirit dhe migracionit, kontrollit doganor, kontrollit të ushqimit, kontrollit shëndetësor, si dhe çdo autoritet tjetër, që ka detyra të lidhura me kufirin;

ç) bashkëpunimi me vendet e tjera, në veçanti në vendet fqinje dhe në ato vende të tjera, të cilat janë identifikuar nëpërmjet analizës së riskut, si vende origjine dhe transiti për migracionin e parregullt;

d) masa teknike dhe operacionale, të cilat janë të lidhura me kontrollin kufitar dhe synojnë të parandalojnë migracionin e parregullt dhe të godasin krimin ndërkufitar;

dh) kthimi i shtetasve të huaj që qëndrojnë në mënyrë të parregullt në territorin e Republikës së Shqipërisë;

e) përdorimi i teknologjisë dhe sistemeve për shkëmbimin e informacionit;

ë) mekanizmi i kontrollit të cilësisë.

2. Menaxhimi i integruar i kufirit nuk i ndryshon kompetencat përkatëse të autoriteteve doganore në fushën doganore, veçanërisht në lidhje me kontrollet, menaxhimin e riskut dhe shkëmbimin e informacionit.

Neni 4

Të drejtat themelore

1. Autoritetet përgjegjëse veprojnë në përputhje të plotë me të drejtat dhe liritë themelore të njeriut, të përcaktuara në Kushtetutën e Republikës së Shqipërisë, Konventën Evropiane për Mbrojtjen e të Drejtave të Njeriut dhe Lirive Themelore, Konventën e Gjenevës të datës 28 korrik 1951, “Për statusin e refugjatëve”, si dhe me të drejtën ndërkombëtare të detyrueshme për Republikën e Shqipërisë dhe detyrimet që lidhen me përfitimin e mbrojtjes ndërkombëtare, së bashku me parimin e moskthimit.

2. Gjatë kryerjes së kontrollit kufitar, askush nuk mund të diskriminohet padrejtësisht për shkaqe të tilla, si: gjinia, raca, feja, etnia, gjuha, bindjet politike, fetare apo filozofike, gjendja ekonomike, arsimore, sociale ose përkatësia prindërore.

3. Rojat kufitare, gjatë përmbushjes së detyrave të tyre, u japin përparësi dhe kujdes të veçantë të miturve, personave me aftësi të veçanta apo kategorive të tjera vulnerabël.

4. Vendimet dhe masat në zbatim të këtij ligji janë proporcionale me objektivat e synuar dhe merren në bazë të shqyrtimit rast pas rasti.

KREU II

KONTROLLI KUFITAR

Neni 5

Autoritetet përgjegjëse për kontrollin kufitar

1. Kontrolli kufitar është nën juridiksionin administrativ të ministrit përgjegjës për rendin dhe sigurinë publike.

2. Detyrat e verifikimit kufitar dhe mbikëqyrjes kufitare kryhen nga Policia Kufitare dhe e Migracionit, e cila vepron në përputhje me detyrimet e përcaktuara në këtë ligj dhe përgjegjësitë, që rrjedhin nga akte të tjera ligjore dhe nënligjore, në bashkëpunim me agjencitë e tjera shtetërore, që veprojnë në kufi.

3. Për zbatimin e këtij ligji, Policia Kufitare dhe e Migracionit është e autorizuar të vendosë dhe të përdorë mjete teknike, përfshirë ato teknologjike video-fotografike të mbikëqyrjes së kufirit, stacionare apo të lëvizshme, qen shërbimi, si dhe të ngrejë pengesa për të parandaluar personat të shmangin kontrollin kufitar apo të kalojnë kufirin shtetëror jashtë pikave të autorizuara të kalimit kufitar dhe për të zbuluar veprat penale.

4. Në pikat e kalimit kufitar, Policia Kufitare dhe e Migracionit është e autorizuar të fotografojë dhe të regjistrojë imazhe video-fotografike dhe të përdorë pajisje të tjera automatike, për aq sa ato janë të nevojshme, për të verifikuar identitetin e personave dhe për të parandaluar e për të zbuluar veprat penale, si dhe për të kapur autorët e tyre. Pajisjet instalohen në vende të dukshme dhe publiku informohet për praninë e tyre.

5. Policia Kufitare dhe e Migracionit është e autorizuar të zbatojë sisteme të automatizuara të verifikimit kufitar, ku nëpërmjet përdorimit të pajisjeve elektronike mblidhen të dhëna për identifikim dhe për qëllim të verifikimit kufitar të automatizuar.

6. Policia Kufitare dhe e Migracionit ka në dispozicion burime njerëzore, burime financiare, pajisje dhe teknologji të përshtatshme, të nevojshme për kryerjen e verifikimit kufitar dhe mbikëqyrjes së kufirit shtetëror, në mënyrë të tillë që të sigurojë një nivel të efektshëm, të lartë dhe uniform të kontrollit në kufirin shtetëror të Republikës së Shqipërisë.

Kompetencat e Policisë Kufitare dhe të Migracionit në kufi

1. Rojat kufitare, në kuadër të kontrollit kufitar, janë të autorizuar të verifikojnë identitetin e personave, subjektin e kontrollit, arsyen për kalimin e kufirit shtetëror, mjetet e tyre të transportit dhe sendet që kanë në zotërim, nga jashtë dhe nga brenda. Çdo person është i detyruar të bashkëpunojë në verifikimin e identitetit e të arsyeve të kalimit të kufirit shtetëror, të mundësojë zbatimin e menjëhershëm të kësaj mase, si dhe të sigurojë që automjeti e sendet e tij të mund të verifikohen.

2. Rojat kufitare, në kuadër të verifikimit kufitar, duhet t'u japin nëpunësve të doganave apo nëpunësve të çdo autoriteti tjetër përgjegjës që operon në kufirin shtetëror mundësinë e kryerjes së verifikimeve të përbashkëta me ta, kur këta janë të pranishëm gjatë verifikimit kufitar. Rregullat për kryerjen e verifikimeve kufitare të përbashkëta përcaktohen me vendim të Këshillit të Ministrave.

3. Rojat kufitare kanë të drejtë, në kuadër të kontrollit kufitar:

a) të verifikojnë:

i. origjinalitetin e dokumenteve të udhëtimit, duke përdorur certifikatat e siguruar në përputhje me legjislacionin për gjendjen civile, dokumentet e identifikimit dhe dokumentet e udhëtimit;

ii. në rast dyshimi të arsyeshëm, identitetin e mbajtësit të dokumenteve të udhëtimit ose vizës, duke krahasuar identifikuesit biometrikë, të depozituar në baza specifike/konkrete që do të aksesohen, duke kufizuar nivelet e aksesit, përveç ADN-së, me personin që po verifikohet;

b) të sekuestrojnë dokumente udhëtimi, kur ekziston dyshim i arsyeshëm se:

i. dokumenti i udhëtimit ose viza të dokumenti i udhëtimit është e falsifikuar ose e rremë;

ii. janë përdorur për të siguruar informacion të rremë për një person.

4. Nëse vërtetohet se një dokument i sekuestruar nuk është objekt i ndonjë mase të parashikuar nga Kodi Penal, u dorëzohet autoriteteve kompetente për atë kohë sa është i nevojshëm sekuestrimi dhe më pas i kthehet personit ose shtetit që ka lëshuar dokumentin.

5. Rojat kufitare për të kryer kontrollin kufitar kanë të drejtë të hyjnë në çdo ngastër toke dhe në të gjithë ujërat, si dhe të drejtojnë automjetet në çdo rrugë, për sa kohë kjo është e nevojshme për përmbushjen e detyrave të tyre.

6. Rojat kufitare, për arsye të verifikimit kufitar, kanë të drejtën të refuzojnë hyrjen dhe daljen e një të huaji, në përputhje me parashikimet e ligjit për të huajt.

7. Rojat kufitare, për arsye të verifikimit kufitar, kanë gjithashtu të drejtën t'u refuzojnë daljen personave:

a) që nuk kanë një dokument të vlefshëm udhëtimi;

b) për të cilët ka një urdhër gjykatë që ndalon daljen nga Republika e Shqipërisë;

c) që duan t'i fshihen ndjekjes penale, ndalimit, arrestimit apo ekzekutimit të dënimit me burgim;

ç) të cilëve u është bllokuar pasaporta, karta e identitetit, pasaporta për të huaj apo pasaporta për refugjatë ose për të cilët ka një urdhër apo një vendim për bllokim apo kufizim të vlefshmërisë territoriale të dokumentacionit të sipërpërmendur ose për cilët ka prova thelbësore që çojnë në përfundimin se ka arsye për të bllokuar dokumentin e personit apo për të kufizuar vlefshmërinë e tij territoriale;

d) që u është mohuar lëshimi i dokumenteve të udhëtimit, të përmendura në shkronjën “ç” të kësaj pike;

dh) të cilët gjatë daljes nga Republika e Shqipërisë përdorin dokumentin e një personi tjetër ose dokument të falsifikuar;

e) të cilët janë të regjistruar në dokumentin e udhëtimit të dikujt tjetër dhe gjatë daljes nga territori i Republikës së Shqipërisë nuk janë të shoqëruar nga personi në dokumentin e të cilit janë regjistruar.

8. Rojat kufitare kanë të drejtë të zbatojnë me forcë masat e përmendura në pikat 1, 3, 4, 5 dhe 6 të këtij neni, në mënyrë proporcionale dhe si mjet i fundit, pasi janë shteruar të gjitha mjetet e tjera efektive, në raport me situatën specifike dhe vlerësimin e riskut.

Neni 7

Kompetencat e Policisë Kufitare dhe të Migracionit në brendësi të territorit

1. Policia Kufitare dhe e Migracionit ka të drejtë që në brendësi të territorit të Republikës së Shqipërisë të marrë masa për të zbuluar të huajt që qëndrojnë ose që kalojnë transit në territorin e Republikës së Shqipërisë, në mënyrë të paligjshme, si dhe të parandalojë, të zbulojë dhe të luftojë krimin ndërkufitar.

2. Policia Kufitare dhe e Migracionit ka të drejtë të verifikojë dhe të intervistojë persona, të kontrollojë mjetet e tyre të transportit dhe sendet që kanë në zotërim, brenda territorit të Republikës së Shqipërisë, me qëllim ndalimin e hyrjes, kalimit transit dhe qëndrimit të paligjshëm të të huajve në Republikën e Shqipërisë.

3. Policia Kufitare dhe e Migracionit ka gjithashtu të drejtë të ndërmarrë veprime hetimore dhe procedurale në rastet e veprave penale që lidhen me kufirin, përveç atyre veprave që janë përcaktuar të ndiqen posaçërisht nga struktura të tjera të policisë ose agjenci të tjera.

Neni 8

Pikat e kalimit kufitar

1. Një pikë kalimi kufitar hapet dhe përcaktohet me vendim të Këshillit të Ministrave. Në rastet e pikave të kalimit kufitar tokësor, vendimi bazohet në akte ndërkombëtare, të detyrueshme për Republikën e Shqipërisë. Në marrëveshje me vendet fqinje ose në vendimin e Këshillit të Ministrave përcaktohen gjithashtu vendndodhja dhe kufizime të mundshme për grupe personash, llojin e qarkullimit ose kufizimet gjeografike.

2. Si përjashtim nga pika 1 e këtij neni, titullari vendor i Policisë Kufitare dhe e Migracionit, pas konsultimit me autoritetin qendror të Policisë Kufitare dhe të Migracionit dhe me autoritetin doganor të zonës përkatëse të juridiksionit, ka të drejtë të nxjerrë urdhër të argumentuar për hapjen e një pike të përkohshme të kalimit kufitar në zonën përkatëse të juridiksionit të tij. Pika e përkohshme e kalimit kufitar funksionon deri në 14 ditë rresht, kur ajo është e nevojshme për sigurimin e zbatimit të projekteve të qarkullimit lokal ndërkufitar, si aktivitet kulturor, turistik, shkencor, sportiv, ushtrim i emergjencave civile, masa për devijim të qarkullimit rrugor ose veprimtari bujqësore apo pyjore. Në urdhrin për hapjen e pikës së përkohshme të kalimit kufitar përfshihen vendndodhja, orari zyrtar, si dhe kufizimet e mundshme për grupe personash, lloji i qarkullimit ose kufizimet gjeografike dhe ky urdhër bazohet në konsultimet me autoritetet lokale, që lidhen me kontrollin kufitar.

3. Shpenzimet, që lindin për hapjen e pikave të përkohshme të kalimit kufitar, të cilat nuk i shërbejnë qarkullimit kufitar të publikut të gjerë, por vetëm disa personave, përballohen nga pala që bën kërkesën për hapjen e pikës së përkohshme të kalimit kufitar.

4. Gjatë lidhjes së marrëveshjes me vendet fqinje ose nxjerrjes së vendimit të Këshillit të Ministrave, të përmendur në pikën 1 të këtij neni, dhe gjatë hartimit të urdhrit, të përmendur në pikën 2 të këtij neni, merren parasysh aspektet e rendit dhe të sigurisë publike, marrëdhëniet ekonomike dhe lidhjet ekzistuese ndërkufitare, qarkullimi i pritshëm dhe kapaciteti i burimeve të përshtatshme njerëzore për të plotësuar me personel pikën e kalimit kufitar, parashikimet doganore apo të aviacionit dhe marrëveshjet ekzistuese dypalëshe.

Neni 9

Pikat e përbashkëta të kalimit kufitar

1. Pikat e përbashkëta të kalimit kufitar hapen dhe përcaktohen me vendim të Këshillit të Ministrave mbi bazën e marrëveshjes ndërkombëtare dypalëshe.

2. Marrëveshja me vendet fqinje për ngritjen e pikave të përbashkëta të kalimit kufitar ratifikohet me ligj.

3. Vendndodhja dhe mënyra e funksionimit të pikës së përbashkët të kalimit kufitar parashikohet në marrëveshje.

4. Organizimi i punës, funksionimi dhe zbatimi i verifikimit të përbashkët kufitar, procedurat e punës, përdorimi i përbashkët i pajisjeve, pagesat e shpenzimeve dhe çdo detaj tjetër teknik përcaktohen në protokollin e zbatimit, të miratuar nga palët.

Neni 10

Infrastruktura në pikat e kalimit kufitar

1. Pikat e kalimit kufitar përshtaten në mënyrë të tillë që verifikimet kufitare të mund të kryhen në përputhje me parashikimet e këtij ligji.

2. Operatorët e aeroporteve dhe porteve, si dhe autoritetet përgjegjëse për mirëmbajtjen e rrugëve duhet të garantojnë nëpërmjet infrastrukturës së përshtatshme dhe masave organizative që kontrollet kufitare në aeroporte dhe porte të kryhen në përputhje me dispozitat e këtij ligji. Shpenzimet, që rrjedhin nga këto aktivitete, përballohen nga operatorët e aeroporteve dhe porteve, si dhe nga autoritetet përgjegjëse për mirëmbajtjen e rrugëve.

Neni 11

Zona e verifikimit kufitar

1. Çdo pikë e kalimit kufitar, në formë rrethore, si dhe përgjatë gjithë vijës së kufirit, në kufijtë tokësorë, ka një zonë të verifikimit kufitar, që është 2 km në brendësi të territorit. Brenda kësaj zone rojat kufitare janë të autorizuar të kryejnë verifikime kufitare sipas kompetencave të dhëna atyre në këtë ligj.

2. Rreth çdo pike të kalimit kufitar caktohet një zonë e sigurisë kufitare, e cila përcaktohet me vendim të Këshillit të Ministrave.

3. Brenda zonës së sigurisë kufitare nuk lejohet asnjë ndërtim apo zhvillim i ndonjë aktiviteti privat, përveç atyre, të cilat i shërbejnë mirëfunksionimit të veprimtarisë së agjencive shtetërore, që veprojnë në kufi dhe që ofrojnë shërbime.

4. Zona e verifikimit kufitar në qarkullimin hekurudhor mbulon shinat dhe ambiente të tjera të hekurudhës, nga pika e kalimit kufitar deri në brendësi të vendit, në aq shtrirje sa është e nevojshme për të kryer verifikime kufitare të efektshme.

5. Zona e verifikimit kufitar në aeroporte dhe porte, që janë pika të kalimit kufitar, mbulon gjithë territorin e aeroportit e të portit.

6. Për pikat e kalimit kufitar të vendosura në shtetin fqinj, zona e verifikimit kufitar në shtetin fqinj përcaktohet në marrëveshjen ndërkombëtare dypalëshe, që rregullon pikën e përbashkët të kalimit kufitar. Në marrëveshjen me vendet fqinje autorizohen gjithashtu rojat kufitare që të kryejnë detyrat e tyre në një zonë të përcaktuar në vendin fqinj. Çdo verifikim që kryhet brenda kësaj zone të përcaktuar të pikës së përbashkët të kalimit kufitar konsiderohet të jetë kryer në zonën e kompetencës së autoritetit vendor të Policisë Kufitare dhe të Migracionit, që ka gjithashtu kompetencën territoriale për pikën e kalimit kufitar.

Neni 12

Tabelat dhe simbolet në pikat e kalimit kufitar dhe në zonën e verifikimit kufitar

1. Pikat e kalimit kufitar, në afërsi të tyre, shënohen me tabela. Tabelat përmbajnë simbolet kombëtare dhe mbishkrimin “Pikë e kalimit kufitar”. Orari zyrtar i pikës dhe kufizimet e mundshme për llojin e qarkullimit paraqiten me tabela shtesë.

2. Nuk vendosen ose nuk ngjiten tabela për:

a) pikat e kalimit kufitar për trafikun hekurudhor;

b) pikat e përkohshme të kalimit kufitar;

c) pikat e kalimit kufitar, që shtrihen në më shumë se 100 metra përgjatë kufirit shtetëror.

3. Në të gjitha rrugët kryesore që të çojnë në kufi, si dhe në porte e aeroporte, zona e verifikimit kufitar shënohet me tabela.

4. Për të lehtësuar mbarëvajtjen e verifikimit kufitar, në pikat ajrore të kalimit kufitar sigurohen korsi të ndara, të shënuara me tabela. Korsi të ndara me tabela të veçanta mund të sigurohen gjithashtu edhe në pikat tokësore dhe detare të kalimit kufitar.

5. Në rast të një çekuilibrimi të përkohshëm të fluksit të qarkullimit, rregullat në lidhje me përdorimin e korsive të ndryshme mund të shmangen, për sa kohë është e nevojshme për të eliminuar këtë çekuilibrim. Vendimi për këtë merret nga roja kufitare më e lartë që është në shërbim në pikën e kalimit kufitar.

6. Tabelat dhe simbolet e përmendura në pikat 1, 3 dhe 4 të këtij neni përcaktohen me vendim të Këshillit të Ministrave.

7. Pronarët e hapësirave, që i shërbejnë qarkullimit kufitar, duhet të lejojnë vendosjen e tabelave dhe tabelave shtesë.

Neni 13

Kalimi i kufirit

1. Kalimi i kufirit shtetëror lejohet vetëm në pikat e autorizuar të kalimit kufitar. Në pikat e kalimit kufitar, që nuk janë të hapura 24 orë, orari zyrtar shpallet në mënyrë të dukshme.

2. Përjashtimisht nga rregulli i përcaktuar në pikën 1 të këtij neni, në rastet e forcës madhore ose nëse parashikohet shprehimisht në një marrëveshje ndërkombëtare, të detyrueshme për Republikën e Shqipërisë, kufiri shtetëror mund të kalohet në çdo vend dhe në çdo kohë. Autoriteti i parë vendor ose shtetëror, që njihet me ngjarjen, informon pa asnjë vonesë Policinë Kufitare dhe të Migracionit, ministrinë përgjegjëse për rendin dhe sigurinë publike, ministrinë përgjegjëse për mbrojtjen dhe emergjencat civile, ministrinë përgjegjëse për punët e jashtme.

Neni 14

Verifikimet kufitare

1. Të gjitha lëvizjet ndërkufitare në kufirin shtetëror të Republikës së Shqipërisë janë subjekt i verifikimeve kufitare nga rojat kufitare.

2. Kalimi i kufirit shtetëror në një pikë të kalimit kufitar, ashtu dhe hyrja në rrethana të jashtëzakonshme dhe emergjence në territorin e Republikës së Shqipërisë, me anije ose me avion, jashtë territorit të aeroportit apo portit, të përcaktuar si pikë e kalimit kufitar, detyron personin t'i nënshtrohet verifikimit kufitar.

3. Kushdo që ka synim të kalojë kufirin shtetëror ose që sapo e ka kaluar atë në një pikë të autorizuar të kalimit kufitar, i nënshtrohet verifikimit kufitar dhe është i detyruar që brenda zonës së verifikimit kufitar:

a) të japë informacion nëse ka kaluar ose ka për synim ta kalojë kufirin;

b) të kalojë, pa asnjë vonesë, në korsitë e përcaktuara për verifikimin kufitar në zonën e verifikimit kufitar, si dhe të zbatojë urdhrat për kryerjen në mënyrë të përshtatshme dhe në kohë të shpejtë të verifikimit kufitar.

4. Në verifikimet kufitare mund të përfshihen mjetet e transportit dhe sendet në zotërim të personave që kalojnë kufirin shtetëror.

Neni 15

Verifikimi kufitar i personave

1. Në hyrje dhe në dalje, të gjithë personat janë subjekt i verifikimit kufitar minimal, i cili përbëhet nga:

a) verifikimi i identitetit e i shtetësisë së personit, si dhe i vlefshmërisë e i origjinalitetit të dokumentit të udhëtimit, duke përdorur pajisje teknike dhe duke u konsultuar me bazat përkatëse të të dhënave, veçanërisht me:

i. bazat kombëtare të të dhënave, që përmbajnë informacion për dokumentet e vjedhura, të përvetësuara, të humbura dhe të zhvleftësuara të udhëtimit;

- ii. bazën e të dhënave të INTERPOL-it për dokumentet e vjedhura dhe të humbura të udhëtimit;
- iii. bazat ndërkombëtare të të dhënave, të njohura nga Republika e Shqipërisë.

b) verifikimi që personi, mjeti i tij i transportit dhe sendet që ai transporton nuk përbëjnë rrezik për rendin dhe sigurinë publike, shëndetin publik dhe marrëdhëniet ndërkombëtare me shtetet e tjera, duke u konsultuar me regjistrat dhe bazat e të dhënave përkatëse. Kur ka dyshime për origjinalitetin e dokumentit të udhëtimit ose për identitetin e mbajtësit të tij, në verifikime përfshihen verifikimi i identifikuesve biometrikë të integruar në pasaportat dhe dokumentet e udhëtimit.

2. Të huajt, krahas verifikimeve të përmendura në pikën 1 të këtij neni, janë subjekt i verifikimeve tërësore në hyrje dhe në dalje, të cilat konsistojnë në verifikimin e plotësimit të të gjitha kushteve për kalimin e kufirit shtetëror.

3. Verifikimet kufitare tërësore në hyrje përbëhen nga:

a) verifikimi i të huajt, nëse ai posedon, për kalimin e kufirit shtetëror, një dokument udhëtimi të njohur nga Republika e Shqipërisë, të shoqëruar me vizë ose leje qëndrimi, kur kjo kërkohet nga legjislacioni;

b) këqyrja e plotë e dokumentit për ndonjë shenjë falsifikimi, sajimi apo tjetërsimi;

c) shqyrtimi i vulave të hyrjeve/daljeve në dokumentin e udhëtimit, duke i krahasuar me të dhënat në bazat e të dhënave të hyrjeve/daljeve, për të verifikuar nëse i huaji ka tejkaluar afatin e autorizuar të qëndrimit në territorin e vendit;

ç) verifikimi i dokumentacionit për nisjen, destinacionin dhe arsyen e qëndrimit të personit;

d) verifikimi i të huajt nëse ai ka mjete të mjaftueshme financiare për kohën dhe qëllimin e qëndrimit, si dhe për kthimin në vendin e origjinës apo për kalimin transit në një vend të tretë, ku i lejohet të hyjë ose verifikimi se ai është në gjendje t'i sigurojë këto mjete financiare në mënyrë të ligjshme.

4. Verifikimet kufitare tërësore në dalje përbëhen nga:

a) verifikimi nëse personi posedon një vizë të vlefshme, në qoftë se kjo kërkohet, përveçse kur ai mban një leje qëndrimi të vlefshme, të lëshuar në Republikën e Shqipërisë, ose dokumente të tjera që autorizojnë qëndrim apo rihyrje në territorin e Republikës së Shqipërisë;

b) verifikimi nëse personi ka shkelur afatin e lejuar të qëndrimit në territorin e Republikës së Shqipërisë, në qoftë se ai është subjekt i një afati të limituar qëndrimi.

5. Përjashtimisht, shtetasit e Bashkimit Evropian, Zonës Ekonomike Evropiane, Zvicrës, Andorrës, Monakos dhe San-Marinot, si dhe të huajt që janë familjarë të tyre dhe që gëzojnë të drejtën e Bashkimit Evropian për lëvizje të lirë ose që janë familjarë të shtetasve shqiptarë, në rast se identiteti dhe lidhjet familjare të tyre provohen, i nënshtrohen verifikimit minimal. Përkufizimi i anëtarëve të familjes në ligjin për të huajt është i vlefshëm edhe për këtë ligj.

6. Personat, që janë subjekt i verifikimit kufitar minimal, në bazë të analizës së riskut dhe në mënyrë josistematike, mund t'i nënshtrohen verifikimit tërësor.

7. Nëse nga rezultatet e verifikimit në vijën e parë konsiderohen të nevojshme verifikime të mëtejshme, personit i kërkohet t'i nënshtrohet verifikimit në vijën e dytë, i cili mund të përfshijë verifikime të hollësishme personale, verifikime të hollësishme të sendeve në posedim dhe inspektime të hollësishme të automjetit.

8. Aty ku janë kushtet, verifikimet e vijës së dytë kryhen në ambiente të përshtatura posaçërisht për këtë qëllim.

9. Të gjithë personat, që janë subjekt i verifikimit në vijën e dytë, informohen me shkrim për qëllimin dhe procedurat që ndiqen gjatë këtij verifikimi, në një gjuhë që e kuptojnë apo që ka arsye për të besuar se e kuptojnë ose në një mënyrë tjetër efektive. Informacioni pasqyron të drejtën që ka personi, subjekt i verifikimit në vijën e dytë, për të kërkuar emrin ose numrin e identifikimit të rojës kufitare që kryen verifikimin tërësor në vijën e dytë, emrin e pikës së kalimit kufitar dhe datën kur është kaluar kufiri shtetëror. Përmbajtja e këtij informacioni përcaktohet me udhëzim të ministrit përgjegjës për rendin dhe sigurinë publike.

10. Si përjashtim nga rregullat e përgjithshme të verifikimit kufitar, për kategori të caktuara personash dhe mjetesh transporti zbatohen rregulla të veçanta, të cilat përcaktohen me vendim të Këshillit të Ministrave.

Verifikimi i sendeve dhe mjeteve të transportit

1. Verifikimi i sendeve përfshin sendet personale, që zotëron personi që kalon kufirin shtetëror.
2. Në rast se ka dyshime për sende ose objekte të ndaluara të fshehura ose për të verifikuar identitetin e një personi, roja kufitare i kërkon personit të paraqesë të gjitha sendet që ka në zotërim për të bërë të mundur që objektet të këqyren nga brenda dhe jashtë.
3. Verifikimi i mjeteve të tyre të transportit përfshin inspektimin me sy, nga brenda dhe nga jashtë, të mjeteve të transportit dhe verifikimin në bazat përkatëse të të dhënave, të njohura nga Republika e Shqipërisë.
4. Objektet ose sendet e tjera, që zbulohen gjatë verifikimit dhe procedurës së inspektimit, të cilat nuk janë objekt i punës së Policisë Kufitare dhe të Migracionit, u dorëzohen autoriteteve doganore ose autoriteteve të tjera përgjegjëse që operojnë në kufi. Procedurat e verifikimit dhe inspektimit zbatohen dhe vendimet në rrjedhim të tyre merren në bashkëpunim me autoritetet e përfshira.

Vulosja e dokumenteve të udhëtimit

1. Dokumentet e udhëtimit të të huajve vulosen rregullisht në hyrje dhe në dalje të kufirit shtetëror. Kurdo që është e mundur, i huaji informohet për këtë detyrim. Specifikisht, vulat për hyrjen dhe daljen vendosen në:
 - a) dokumentet me vizë të vlefshme, që lejojnë personat të kalojnë kufirin shtetëror;
 - b) dokumentet, që lejojnë personat të kalojnë kufirin shtetëror, pasi u është lëshuar një vizë në kufi;
 - c) dokumentet, që lejojnë të kalojnë kufirin shtetëror personat që nuk kanë nevojë për vizë.
2. Nuk vendoset vulë në hyrje ose dalje në:
 - a) dokumentet e udhëtimit të shtetasve të Republikës së Shqipërisë, të Bashkimit Evropian, të Zonës Ekonomike Evropiane, të Zvicrës, të Andorrës, të Monakos dhe të San-Marinot;
 - b) dokumentet e udhëtimit të kryetarëve të shteteve e të personaliteteve, mbërritja e të cilëve është njoftuar paraprakisht nëpërmjet kanaleve diplomatike;
 - c) licencat e pilotëve ose certifikatat e anëtarëve të ekuipazhit të avionit;
 - ç) dokumentet e udhëtimit të marinarëve, brenda zonës së verifikimit kufitar të portit, në të cilin anija e tyre ankorohet;
 - d) dokumentet e udhëtimit të ekuipazhit dhe pasagjerëve të anijeve turistike, që nuk janë subjekt i verifikimit kufitar;
 - dh) dokumentet e banorëve kufitarë, që përfitojnë regjim të qarkullimit lokal kufitar;
 - e) dokumentet e udhëtimit të të huajve, që paraqesin një leje të vlefshme qëndrimi, në përputhje me legjislacionin për të huajt;
 - ë) dokumentet e udhëtimit të ekuipazhit të trenave të udhëtarëve dhe të mallrave në linjat ndërkombëtare.
3. Dokumentet e udhëtimit të të huajve, që janë anëtarë të familjeve të shtetasve të Republikës së Shqipërisë, të shtetasve të Bashkimit Evropian, të shtetasve të Zonës Ekonomike Evropiane dhe të shtetasve të Zvicrës, Andorrës, Monakos dhe San-Marinot, të cilët nuk paraqesin një leje qëndrimi të vlefshme, duhet të vulosen në hyrje dhe në dalje.
4. Si përjashtim, me kërkesë të të huajit, mund të mos bëhet vendosja e vulës së hyrje-daljes nëse vendosja e saj mund të krijojë vështirësi serioze për personin. Në këtë rast, vula e hyrjes dhe e daljes vendoset në një fletë më vete, ku specifikohen emri dhe mbiemri i personit, si dhe numri i pasaportës. Kjo fletë i dorëzohet shtetasit të huaj. Policia Kufitare dhe e Migracionit mban statistika për këto raste përjashtimore.
5. Format i dhe specifikimet teknike të vulave, si dhe rregullat praktike për vulosjen përcaktohen me vendim të Këshillit të Ministrave.

Neni 18

Lehtësimi i verifikimeve kufitare

1. Verifikimet kufitare mund të lehtësohen në situata të veçanta dhe të paparashikuara, që sjellin ngarkesë në qarkullim në pikën e kalimit kufitar dhe kur të gjitha burimet, që lidhen me personelin, pajisjet, ambientet dhe organizimin, janë shteruar.

2. Vendimi për lehtësim, në përputhje me pikën 1 të këtij neni, merret nga roja kufitare më e lartë që është në shërbim në pikën e kalimit kufitar.

3. Lehtësimi i verifikimeve është i përkohshëm, në përputhje me rrethanat justifikuese të tij dhe zbatohet gradualisht.

4. Kur verifikimet kufitare janë të lehtësuara, verifikimet kufitare të lëvizjeve në hyrje, si parim, fitojnë përparësi ndaj verifikimeve kufitare të lëvizjeve në dalje.

5. Në rastet kur verifikimet kufitare janë të lehtësuara, rojat kufitare mund të mos kryejnë regjistrimin, por pas verifikimit të vlefshmërisë së dokumentit dhe të identitetit të mbajtësit, duhet të vulosin dokumentet e udhëtimit të të huajve në hyrje dhe në dalje, siç parashikohet në nenin 17 të këtij ligji.

6. Në pikën e kalimit kufitar mbahen regjistrimet për arsyet, kohën e fillimit dhe kohën e përfundimit të lehtësimit.

KREU III

RREGULLAT E QARKULLIMIT LOKAL KUFITAR

Neni 19

Zbatimi i qarkullimit lokal kufitar

1. Me qëllim zbatimin e regjimit të qarkullimit lokal kufitar, Këshilli i Ministrave mund të nënshkruajë marrëveshje dypalëshe me vendet fqinje, në përputhje me rregullat e përcaktuara në këtë ligj.

2. Qarkullimi lokal kufitar zbatohet vetëm për shtetasit që banojnë jo më larg se 30 km nga kufiri shtetëror dhe 5 km nga pika më e afërt e kalimit kufitar, për të paktën 1 vit, e parashikuar në marrëveshjen dypalëshe me vendet fqinje. Lista e qendrave të banuara do të jetë pjesë integrale e marrëveshjes.

3. Qarkullimi lokal kufitar, përveç pikave të kalimit kufitar, bëhet edhe nëpërmjet vendkalimeve të veçanta kufitare, të cilat miratohen me marrëveshje, të lidhura vetëm për qarkullimin lokal të kufirit.

Neni 20

Përjashtime

Rregullat e qarkullimit lokal kufitar nuk ndikojnë për rregullat e parashikuara nga legjislacioni, që lidhen me:

- a) qëndrimin afatgjatë të shtetasve të huaj në Republikën e Shqipërisë;
- b) aksesin dhe ushtrimin e aktivitetit ekonomik të shtetasve të huaj në Republikën e Shqipërisë;
- c) çështjet doganore dhe tatimore.

Neni 21

Regjimi i qarkullimit lokal kufitar

1. Shtetasit, që jetojnë në zonat kufitare tokësore, mund të kalojnë kufirin tokësor, në përputhje me rregullat e regjimit të qarkullimit kufitar, me kusht që:

- a) të jenë të pajisur me leje të qarkullimit lokal kufitar dhe me një dokument apo dokumente të vlefshme identifikimi ose udhëtimi;
- b) të mos jenë persona, të cilëve u është ndaluar hyrja në Republikën e Shqipërisë;
- c) të mos jenë persona që konsiderohen të jenë kërcënim për sigurinë publike, shëndetin publik ose marrëdhëniet ndërkombëtare të Republikës së Shqipërisë.

2. Shtetasit e huaj, që jetojnë në zonat e përcaktuara kufitare të vendit fqinj, kanë të drejtë të qëndrojnë në zonat kufitare të Republikës së Shqipërisë, jo më gjatë se 90 ditë, brenda 180 ditëve.

3. Të miturit nën moshën 16 vjeç përjashtohen nga detyrimi për të qenë të pajisur me dokument të vlefshëm identifikimi apo udhëtimi.

4. Të miturit, që për arsye të kushteve lokale frekuentojnë shkollat 9-vjeçare dhe të mesme në Republikën e Shqipërisë, përjashtohen nga kushti i parashikuar në pikën 2 të këtij neni.

Neni 22

Leja e qarkullimit lokal kufitar

1. Me qëllim zbatimin e regjimit të qarkullimit lokal kufitar, ministria përgjegjëse për menaxhimin e kufirit, nëpërmjet autoriteteve përgjegjëse, garanton pajisjen me leje të qarkullimit lokal kufitar të shtetasve që banojnë pranë zonës kufitare të vendit me të cilin zbatohet ky regjim, mbi bazën e kërkesës së tyre.

2. Format dhe përmbajtja e aplikimit miratohet me dakordësinë e palëve në marrëveshje. Aplikimi për t'u pajisur me leje qarkullimi lokal kufitar bëhet nëpërmjet portalit unik qeveritar "e-Albania".

3. Vlefshmëria e lejes së qarkullimit lokal kufitar është e kufizuar vetëm në zonën kufitare dhe ka afat vlefshmërie deri në 5 vjet, por jo më shumë se vlefshmëria e dokumentit të identifikimit apo udhëtimit të banorit kufitar, që aplikon për një leje të tillë.

4. Leja e qarkullimit lokal kufitar anulohet kur banori kufitar i pajisur nuk është më banor i zonës kufitare.

5. Leja e qarkullimit lokal kufitar shfuqizohet në rastet kur lind një nga kushtet e parashikuara në shkronjat "b" dhe "c" të pikës 1 të nenit 21 të këtij ligji, kur mbajtësi vepron në mënyrë të përsëritur, në kundërshtim me parashikimet e pikës 2 të nenit 21 dhe të shkronjës "c" të pikës 1 të nenit 24 të këtij ligji.

6. Leja e qarkullimit lokal kufitar nuk është dokument identifikimi, përveç rastit të parashikuar në pikën 3 të nenit 21 të këtij ligji.

Neni 23

Përmbajtja, forma dhe elementet e sigurisë së lejes së qarkullimit lokal kufitar

1. Leja e qarkullimit lokal kufitar përmban, të paktën:

- a) foton e mbajtësit;
- b) emrin, mbiemrin, datën e lindjes, shtetësinë dhe vendbanimin e mbajtësit;
- c) autoritetin lëshues dhe periudhën e vlefshmërisë;
- ç) zonën kufitare në të cilën mbajtësi autorizohet të lëvizë dhe të qëndrojë;
- d) numrin/numrat e dokumenteve të identifikimit apo udhëtimit, me të cilin/cilat mbajtësi autorizohet të kalojë kufirin.

2. Leja e qarkullimit lokal kufitar përmban njoftimin se mbajtësi i lejes nuk është i autorizuar të lëvizë jashtë zonës kufitare.

3. Forma dhe elementet e sigurisë së lejes së qarkullimit kufitar përcaktohen në rregullore, të miratuar me vendim të Këshillit të Ministrave.

Neni 24

Kushtet për pajisjen me leje të qarkullimit lokal kufitar

1. Leja e qarkullimit lokal kufitar mund të lëshohet për shtetasit që banojnë brenda zonave kufitare, të cilët:

- a) posedojnë një dokument të vlefshëm identifikimi apo udhëtimi;
- b) provojnë se janë banorë të zonës kufitare, pjesë e marrëveshjes së nënshkruar;
- c) nuk janë persona, të cilëve u është ndaluar hyrja në Republikën e Shqipërisë;
- ç) nuk janë persona që konsiderohen të jenë kërcënim për sigurinë publike, shëndetin publik ose për marrëdhëniet ndërkombëtare të Republikës së Shqipërisë.

2. Procedurat e aplikimit dhe pajisjes me leje të qarkullimit kufitar përcaktohen në rregullore, të miratuar me vendim të Këshillit të Ministrave.

Neni 25

Lehtësimi i qarkullimit lokal kufitar

1. Marrëveshjet dypalëshe me vendet fqinje, të parashikuara në pikën 1 të nenit 19, mund të parashikojnë lehtësimin e kalimit të kufirit nëpërmjet:

- a) hapjes së pikave të veçanta të kalimit kufitar për banorët kufitarë;
- b) rezervimit të korsive të veçanta për shtetasit që banojnë brenda zonave kufitare, në pikat e zakonshme të kalimit kufitar; ose
- c) autorizimit të banorëve kufitarë që të kalojnë kufirin e tyre tokësor në vende të përcaktuara, përveç pikave të autorizuar të kalimit kufitar dhe jashtë orarit të caktuar, duke marrë parasysh rrethanat lokale dhe, kur, në raste të veçanta, ka një kërkesë të një natyre të veçantë.

2. Vendet ku do të lejohet kalimi i kufirit tokësor do të parashikohen në marrëveshjen përkatëse.

3. Në rastet kur vendoset lehtësimi i kalimit të kufirit për shtetasit që banojnë brenda zonave kufitare, në përputhje me pikën 1, do të lehtësohet kalimi i kufirit për çdo person, që gëzon të drejtën për lëvizje të lirë, që banon në zonën kufitare në fjalë.

4. Në rastet kur në marrëveshje parashikohet lehtësimi i kalimit të kufirit për banorët kufitarë, sipas parashikimeve të shkronjës “c” të pikës 1 të këtij neni:

a) leja e qarkullimit lokal kufitar duhet të përmbajë, përveç informacionit të parashikuar nga neni 23 i këtij ligji, detajet e vendit dhe rrethanat në të cilat mund të kalohet kufiri tokësor;

b) Policia Kufitare dhe e Migracionit ushtron kontrolle të rastësishme dhe kryen mbikëqyrje të rregullt të kufirit për të parandaluar kalimet e paligjshme të kufirit.

KREU IV

MBIKËQYRJA E KUFIRIT

Neni 26

Mbikëqyrja e kufirit

1. Mbikëqyrja e kufirit kryhet me qëllim që të parandalojë kalimet e paautorizuara të kufirit, të zbulojë dhe të luftojë krimin ndërkufitar, si dhe të marrë masa ndaj personave që kanë kaluar kufirin në mënyrë të paligjshme.

2. Mbikëqyrja midis pikave të kalimit kufitar kryhet nga rojat kufitare. Metodat e veprimit dhe numri i rojave kufitare përshiaten dhe ndryshojnë në raport me rrezikun.

3. Mbikëqyrja kryhet me njësi stacionare ose të lëvizshme, të cilat kryejnë detyrën duke patrulluar ose duke u pozicionuar në vende në bazë të analizës së riskut dhe informacionit policor, me qëllim parandalimin dhe goditjen e veprimtarisë së paligjshme ndërkufitare.

Neni 27

Sistemi i mbikëqyrjes së kufirit

1. Në funksion të sigurisë kufitare dhe të shkëmbimit të informacionit, si dhe për bashkëpunimin në fushën e mbikëqyrjes së kufirit, Policia Kufitare dhe Migracionit dhe agjencitë e tjera kombëtare e ndërkombëtare bashkëpunojnë dhe shkëmbejnë informacion me anë të sistemit për mbikëqyrjen e kufirit, i cili përbëhet nga këta komponentë:

- a) Qendra Kombëtare e Koordinimit për Menaxhimin e Integruar të Kufirit;
- b) situata kombëtare e sigurisë kufitare;
- c) situata rajonale dhe evropiane e sigurisë kufitare;
- ç) rrjeti i komunikimit;
- d) informacioni për situatën në zonën kufitare dhe parakufitare;
- dh) zbatimi i përbashkët i metodave të mbikëqyrjes.

2. Rregullorja e sistemit të mbikëqyrjes së kufirit miratohet me vendim të Këshillit të Ministrave.

Qendra Kombëtare e Koordinimit për Menaxhimin e Integruar të Kufirit

1. Qendra Kombëtare e Koordinimit për Menaxhimin e Integruar të Kufirit është strukturë ndërinstitucionale, që ngrihet me vendim të Këshillit të Ministrave, në të cilin përcaktohet funksionimi i saj.

2. Qendra Kombëtare e Koordinimit për Menaxhimin e Integruar të Kufirit funksionon pa ndërprerje njëzet e katër orë në shtatë ditë të javës dhe ka përgjegjësi:

a) të sigurojë shkëmbimin në kohë reale të informacionit dhe bashkëpunimin e menjëhershëm midis të gjitha autoriteteve kombëtare, me përgjegjësi për mbikëqyrjen e kufirit me të tjera qendra kombëtare të koordinimit të vendeve të tjera, si dhe me Agjencinë Evropiane të Rojës Kufitare dhe Bregdetare;

b) të sigurojë shkëmbimin në kohë të informacionit me autoritetet e kërkim - shpëtimit, të zbatimit të ligjit, të azilit dhe të migracionit, në nivel kombëtar;

c) të kontribuojë në një menaxhim efektiv dhe efikas të burimeve njerëzore;

ç) të hartojë dhe të administrojë raportet e situatës kombëtare të sigurisë kufitare e ato rajonale dhe evropiane të sigurisë kufitare, me ndikim të mundshëm në situatën kombëtare të sigurisë;

d) të mbështesë planifikimin dhe zbatimin e aktiviteteve të mbikëqyrjes së kufirit;

dh) të koordinojë zbatimin e sistemit kombëtar të mbikëqyrjes së kufirit;

e) të kontribuojë në vlerësimin e rregullt të efekteve kombëtare të aktiviteteve të mbikëqyrjes së kufirit;

ë) të koordinojë masat operationale me autoritetet e vendeve të tjera dhe organizatat dhe agjencitë ndërkombëtare, bazuar në marrëveshjet e bashkëpunimit;

f) të informojë publikun në lidhje me situatën e fluksit dhe kohën e përpunimit të të dhënave të udhëtarëve në pikat e kalimit kufitar;

g) të menaxhojë kufirin në rast konflikti të armatosur, epidemie globale dhe emigrimi masiv.

3. Struktura dhe organika e Qendrës, procedurat standarde të punës së Qendrës, përshkrimet e punës, detyrat funksionale të personelit të Qendrës, format dhe modelet e raportimit miratohen me urdhër të përbashkët të ministrit përgjegjës për rendin dhe sigurinë publike, ministrit përgjegjës për financat dhe ministrit përgjegjës për bujqësinë.

Vlerësimi i sigurisë në nivel kombëtar dhe rajonal

1. Autoritetet përgjegjëse për garantimin e sigurisë së kufirit bashkëpunojnë për hartimin e vlerësimeve kombëtare dhe rajonale të situatës së sigurisë së kufirit.

2. Vlerësimet kombëtare të situatës së sigurisë së kufirit janë produkt i grumbullimit, vlerësimit, krahasimit, analizës, interpretimit, gjenerimit dhe shpërndarjes së informacionit dhe përmbajnë informacion rreth ngjarjeve dhe incidenteve, informacion operacional dhe raporte analitike.

3. Qendra Kombëtare e Koordinimit për Menaxhimin e Integruar të Kufirit përmes strukturave përgjegjëse mbledh, përpunon, vlerëson informacionin operacional të situatës në zonën kufitare e parakufitare dhe çdo informacion tjetër rreth ngjarjeve dhe incidenteve e harton raporte e analiza lidhur me situatën e sigurisë në kufi.

4. Qendra Kombëtare e Koordinimit për Menaxhimin e Integruar të Kufirit bashkëpunon me Agjencinë Evropiane të Rojës Kufitare dhe Bregdetare dhe shkëmben informacion në kuadër të hartimit dhe informimit për raportet e situatës evropiane të sigurisë kufitare.

Rrjeti i komunikimit

1. Policia Kufitare dhe e Migracionit krijon dhe mirëmban një rrjet komunikimi që mundëson komunikimin e Qendrës Kombëtare të Koordinimit për Menaxhimin e Integruar të Kufirit me partnerët e saj, me qëllim shkëmbimin e sigurt dhe në kohë të informacionit. Rrjeti funksionon njëzet e katër orë në shtatë ditë në javë dhe siguron:

a) shkëmbimin në kohë të informacionit në nivel bilateral dhe multilateral;

b) trajtimin, ruajtjen, transmetimin dhe përpunimin e sigurt të informacionit të klasifikuar dhe jo të klasifikuar.

2. Qendra Kombëtare e Koordinimit për Menaxhimin e Integruar të Kufirit shkëmben, përpunon dhe ruan informacione të klasifikuara dhe jo të klasifikuara në rrjetin e komunikimit, në përputhje me legjislacionin në fuqi.

Neni 31

Bashkëpunimi ndërkufitar

1. Autoritetet përgjegjëse për menaxhimin e integruar të kufirit bashkëpunojnë me autoritetet homologe të vendeve të tjera ose me organizata dhe agjenci ndërkombëtare bazuar në marrëveshjet ndërkombëtare dy ose shumëpalëshe.

2. Ky bashkëpunim konsiston, por nuk kufizohet vetëm në:

a) shkëmbimin e informacionit për parandalimin dhe goditjen e krimit ndërkufitar dhe të migracionit të parregullt;

b) analizën e përbashkët të rrezikut;

c) trajnimin bazë, të avancuar e të specializuar, si dhe shkëmbimin e eksperiencës;

ç) ndjekjen në gjendjen e flagrancës;

d) survejimin ndërkufitar;

dh) dorëzimin e kontrolluar;

e) operacionet e përbashkëta të kërkimit dhe shpëtimit;

ë) patrullimet e përbashkëta përgjatë kufirit të përbashkët shtetëror;

f) ngritjen e qendrave të bashkëpunimi policor dhe doganor;

g) pjesëmarrjen në operacionet jashtë vendit dhe implementimin e operacioneve të përbashkëta në vendin tonë.

3. Qendra Kombëtare e Koordinimit për Menaxhimin e Integruar të Kufirit bashkëpunon me Agjencinë Evropiane të Rojës Kufitare dhe Bregdetare për të mundësuar koordinimin e aplikimit të përbashkët të metodave të mbikëqyrjes, në mënyrë që të furnizohen qendrat kombëtare të koordinimit me informacion për mbikëqyrje të kufirit dhe në zonën parakufitare.

4. Modalitetet e bashkëpunimit parashikohen në marrëveshje dhe në protokollet përkatëse, si dhe në planet operationale, të hartuara dhe të miratuara bashkërisht.

KREU V

ADMINISTRIMI I TË DHËNAVE PERSONALE

Neni 32

Përpunimi i të dhënave personale

1. Policia Kufitare dhe e Migracionit ka të drejtë të mbledhë në mënyrë të drejtpërdrejtë të dhëna personale të personave, që janë subjekt i kontrollit kufitar dhe:

a) të regjistrojë manualisht të dhëna;

b) të shënojë manualisht ose elektronikisht të dhënat në një sistem kompjuterik të përpunimit të të dhënave;

c) të identifikojë dhe të regjistrojë të dhëna për qëllim dhe në kohëzgjatje të verifikimeve kufitare të automatizuara, në rast të përdorimit të pajisjeve për verifikimin kufitar të automatizuar;

ç) t'i përdorë ato për kërkime, për qëllim të menaxhimit të sigurisë dhe të aktivitetit me autoritetet e sigurisë, që i shërbejnë drejtësisë penale;

d) në raste dyshimi për një vepër penale, t'i vendosë në dispozicion të një autoriteti tjetër të sigurisë, për qëllime të zbatimit të ligjit, brenda kompetencës ligjore të atij autoriteti.

2. Vendimet për hyrjet dhe daljet depozitohen në sistem kompjuterik të përpunimit të të dhënave.

3. Rregullat për administrimin e të dhënave, të grumbulluara nga zbatimi i këtij ligji, përcaktohen me udhëzim të përbashkët të ministrit përgjegjës për rendin dhe sigurinë publike dhe të Komisionerit për të Drejtën e Informimit dhe Mbrojtjen e të Dhënave Personale.

Neni 33

Të drejtat e subjektit të të dhënave

1. Çdo subjekt të dhënash gëzon të drejtën të marrë nga nëpunësi i mbrojtjes së të dhënave ose struktura përgjegjëse për mbrojtjen e të dhënave personale pranë Policisë së Kufirit dhe e Migracionit konfirmimin nëse të dhënat personale në lidhje me të janë duke u përpunuar ose jo, dhe, sipas rastit, të ketë akses tek të dhënat personale, në zbatim të legjislacionit në fuqi për mbrojtjen e të dhënave personale.

2. Informacioni paraprak për pasagjerin shpërndahet nga njësia e informacionit të pasagjerit pranë autoriteteve përgjegjëse për kontrollin kufitar, me qëllim parandalimin e migracionit të paligjshëm dhe përmirësimin e kontrollit kufitar.

3. Subjekti i të dhënave gëzon të drejtat e parashikuara në legjislacionin në fuqi për mbrojtjen e të dhënave personale, si dhe të drejtën e ankimit dhe kompensimit të dëmit, sipas legjislacionit për gjykimin e mosmarrëveshjeve administrative.

Neni 34

Transferimi ndërkombëtar i të dhënave personale

Policia e Kufirit dhe e Migracionit, lidhur me transferimin ndërkombëtar të të dhënave personale te palët e treta, zbaton dispozitat dhe rregullat e parashikuara në legjislacionin në fuqi për mbrojtjen e të dhënave personale.

KREU VI SANKSIONET

Neni 35

Sanksionet

1. Shkeljet e dispozitave të këtij ligji, kur nuk përbëjnë vepër penale, përbëjnë kundërvajtje administrative dhe dënohen nga Policia Kufitare dhe e Migracionit në përputhje me ligjin nr. 10 279, datë 20.5.2010, “Për kundërvajtjet administrative”, për veprimet ose mosveprimet e çdo personi, që:

a) nuk përmbush detyrimet në lidhje me kontrollin kufitar, në përputhje me pikën 1 të nenit 6, të këtij ligji;

b) pengon rojat kufitare të hyjnë për detyra të kontrollit kufitar në zonat e parashikuara në pikën 5 të nenit 6, të këtij ligji;

c) nuk plotëson detyrimet në përputhje me pikën 2 të nenit 10 të këtij ligji në lidhje me kushtet që ndihmojnë për kontroll kufitar të përshtatshëm;

ç) pengon vendosjen, fshin, mbulon ose tjetërsion një nga tabelat e parashikuara në nenin 12 të këtij ligji;

d) kalon kufirin në kundërshtim me parashikimet e nenit 13 të këtij ligji;

dh) nuk plotëson detyrimet në lidhje me informimin e rojës kufitare, në përputhje me pikën 2 të nenit 13 të këtij ligji;

e) nuk paraqitet për verifikim kufitar në pikën e kalimit kufitar në përputhje me pikën 2 të nenit 14, të këtij ligji;

ë) pavarësisht paralajmërimit, refuzon të japë informacion nëse e ka kaluar kufirin shtetëror apo nëse ka qëllim ta bëjë këtë ose jep informacion të pavërtetë, përkundër parashikimeve në shkronjën “a”, të pikës 3, të nenit 14, të këtij ligji;

f) synon të kalojë kufirin shtetëror ose ka kryer kalimin e kufirit dhe, megjithëse ka marrë instruksionet, nuk ndjek korsitë e parashikuara për kalimin e kufirit, në përputhje me pikën 3, të nenit 14 të këtij ligji;

g) pavarësisht paralajmërimeve, nuk respekton një vendim të marrë në përputhje me shkronjën “b” të pikës 3 të nenit 14 të këtij ligji, duke shkaktuar kështu pengesa dhe vonesa në verifikimin kufitar ose vonesë për mjetet e transportit, që kalojnë kufirin sipas një orari të caktuar.

2. Kundërvajtjet e parashikuara në shkronjat “a”, “ç” dhe “f” të pikës 1 të këtij neni, kur kryhen nga persona fizikë, dënohen me gjobë nga 5 000 deri 50 000 lekë.

3. Kundërvajtjet e parashikuara në shkronjat “b”, “c”, “d”, “dh”, “e”, “ë” dhe “g” të pikës 1 të këtij neni, kur kryhen nga persona fizikë, dënohen me gjobë nga 10 000 deri në 100 000 lekë.

4. Kundërvajtjet e parashikuara në shkronjat “a”, “b”, “c”, “dh”, “e”, “ë”, “f” dhe “g” të pikës 1 të këtij neni, gjobiten përkatësisht me trefishin e shumës së parashikuar për personat fizikë, në rast të kryerjes së tyre nga personat juridikë ose nga përfaqësuesit e tyre ligjorë.

5. Kundërvajtjet e parashikuara në shkronjat “a”, “b”, “d”, “ë”, “f” dhe “g” të pikës 1 të këtij neni, gjobiten përkatësisht me pesëfishin e shumës së parashikuar në pikat 2 dhe 3 të këtij neni, për personat fizikë ose me pesëfishin e parashikimit të pikës 4 të këtij neni në rast se personi i kryen ato duke përdorur mjete lundrimi ose fluturimi.

Neni 36

E drejta e ankimit dhe ekzekutimi i gjobave

1. Gjobat e parashikuara në këtë ligj vendosen nga rojat kufitare dhe janë titull ekzekutiv.

2. E drejta e ankimit dhe ekzekutimi i sanksioneve të parashikuara në këtë ligj zbatohen në përputhje me ligjin nr. 10 279, datë 20.5.2010, “Për kundërvajtjet administrative”.

KREU VII

DISPOZITA PËRFUNDIMTARE

Neni 37

Dispozita kalimtare

1. Kufizimet e qarkullimit ndërkufitar, që rrjedhin nga dispozita të tjera për rrugë të caktuara për transportin hekurudhor, ajror dhe me mjete lundruese, nuk ndikohen nga dispozitat e neneve 8 dhe 12 të këtij ligji.

2. Pikat e kalimit kufitar dhe zonat transit, të cilat janë hapur para hyrjes në fuqi të këtij ligji, janë pika kalimi kufitar dhe zona transit sipas këtij ligji. Lista e të gjitha pikave të kalimit kufitar dhe zonave transit të hapura, ekzistuese përcaktohet me udhëzim të ministrit përgjegjës për rendin dhe sigurinë publike brenda 6 muajve nga hyrja në fuqi e këtij ligji dhe përditësohet brenda 2 muajve, në rast ndryshimi.

3. Pikat e kalimit kufitar, të përmendura në pikën 2 të këtij neni, nga hyrja në fuqi e këtij ligji pajisen me tabela të posaçme, siç përcaktohet në nenin 12 të këtij ligji.

Neni 38

Nxjerrja e akteve nënligjore

1. Ngarkohet Këshilli i Ministrave që brenda 6 muajve nga hyrja në fuqi e këtij ligji të nxjerrë aktet nënligjore në zbatim të neneve 6, pika 2; 11, pika 2; 12, pika 6; 15, pika 10; 17, pika 5; 23, pika 3; 24, pika 2; 27, pika 2, dhe 28, pika 1, të këtij ligji.

2. Ngarkohen ministri përgjegjës për rendin dhe sigurinë publike dhe Komisioneri për të Drejtën e Informimit dhe Mbrojtjen e të Dhënave Personale që brenda 6 muajve nga hyrja në fuqi e këtij ligji të nxjerrin udhëzim të përbashkët në zbatim të pikës 3 të nenit 32 të këtij ligji.

3. Ngarkohet ministri përgjegjës për rendin dhe sigurinë publike që brenda 6 muajve nga hyrja në fuqi e këtij ligji të nxjerrë udhëzim në zbatim të pikës 9 të nenit 15 të këtij ligji.

4. Ngarkohen ministri përgjegjës për rendin dhe sigurinë publike, ministri përgjegjës për financat dhe ministri përgjegjës për bujqësinë të nxjerrin urdhrin e përbashkët në zbatim të pikës 3 të nenit 28 të këtij ligji.

Neni 39
Shfuqizime

Ligji nr. 71/2016, “Për kontrollin kufitar”, i ndryshuar, shfuqizohet.

Neni 40
Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miraturar në datën 26.6.2025.

Shpallur me dekretin nr. 217, datë 7.7.2025, të Presidentit të Republikës së Shqipërisë, Bajram Begaj.